

Eta macartane ema Apóstole Juan, ticaijare

1 JUAN

Eta viúrujasira ema Jesucristo

1 ¹Nuti Juan nímiámareca eta juca nájure eta eyehe. Nuvaraha numetacahe éti, eta véchaquenahi mayehe ema Jesucristo, ema tjaracahavi eta écháji-rirucava ticaitarecarahi. Éma, matiarihíhi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémmahaca te vivahu. ²⁻³Éma, matiarihíhi acane, manasiqueneripahi mayehe ema Maiya. Tiúcupaicapasera eta viyehe. Víti vímatipa eta achánequenériahi éma. Tásiha, puiti vimetacahe eta juca vímahaquenahi éta pa eta visamaquenahi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe. ⁴Tásiha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵Vimetacahe eta máimitusirahavi ema Jesucristo. Eta juca eta macayemaquenahi: “Jararihi eta tjarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

⁶Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahini mayehe, váhivare visuapahini eta mavanairipiana. ⁷Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihi eta manasarichuhi éma eta te majaraivahi. Tásiha, eta vinasirichuhi eta te majaraivahi, viúritarecayarehi eta viúrujusiracaca nayehe ena vichamuriana. Énerichuvare máepachinachayare tamutu eta vicepaturairana, taicha te tépenapa ema Jesucristo Machicha ema Viya, máepusaicahi eta máítine eta máepachinachirahaviyarehi.

⁸Te vicahehipuca: “Tájina eta nupecaturaina”, tacahe, vahi vátupie-mahini eta vipanereruhi. Vítijiva vivayuaracavahi víti.

⁹Téhesera vitupiruvahi eta vimetauresiravahi eta vicapecaturairana mayehe ema Viya, jararիրիբա eta maperdonachirahavihi. Taicha tjaracavahi éma eta maperdonachirahaviyare, vahi táeñamavacarehíni. Énerichuvare májahaya tépachinachahaviyare tamutu eta tamauriqueneana viyehe. ¹⁰Téhesera vicahe-hipuca: “Tájina nupecaturaina”, vépiyaequenehahi ema Viya. Vímicutijiricapa ema máepiyahirahini. Vahi tátupiruvahíni eta vijachapirainahini eta máechajiriruva.

Éma Jesucristo, éma ticatajirahi

2 ¹Nuchichanaveana, nucajurehehi eta júcana taicha nuvaraha vahi ecuca-pecaturaini. Téhesera íchapuca eta pecatu, mararihi éma ticatajirahi viyehe te mamirahu éma Tata Vicaiyaquene. Ticajjare Jesucristo éma ticataji-cahavirahi. Éma, matapiravare; tétavicava eta máuriva. ²Éma, tímicapacavahi táichavenehi eta macaepahairayarehi eta vipecaturana apaesa víuri mayehe éma Viya. Váhisera tácarichu eta vipecaturana víti. Táimicapacahi éma eta macaepa-hairayarehi eta napecaturana namutu éna achaneana te juca apaquehe.

³Tíuri puiti, vicasínavahi eta vímatirahi éma Viya, taicha visuapahi eta mavanairipiana. ⁴Te nararíhipuca éna nácani achaneana nacahehi: “Núti nímati éma Viya”, téhesera vahi nasuapahini eta mavanairipiana, tacahe náepiyevahi éna. Vahi tásuapacarehini eta náechajiriruva. ⁵Étasea eta visuapirahi víti eta mavanai-ripiana tímechahavihi eta víávahásirahi éma Viya. Yátupíhi eta vémunasirahi éma Viya. ⁶Víti vicahehi: “Víávaháca éma Viya”, tásiha, tacamunúhi eta táuríhini eta vítaresirainahini tácutihini eta táurivahi eta máítaresirahi éma Jesucristo.

Éta mavanairipi éma Viya eta vémunasiracacaina

⁷Nuparapenaveana, nuvaraha némechahe te juca carta eta macavanai-ripirahavi éma Jesucristo eta vémunasiracacaya. Te tépanavainapa eta ecaíjuherahi éma Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi éma Jesucristo. ⁸Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraíva éma Maiya. Tásiha éti, te esuapa eta juca mavanairipi, te émunacaca, epauchai- napaipe eta majaraíva éma Viya. Térájicavainapa eyehe eta timapícu.

⁹Te nararíhipuca éna nácani achaneana nacahehi: “Núti návihahi eta te majaraíva éma Viya”, téhesera nacatichahipuca éna nachamuriana, návirarichuhi te timapícu. Vahi napauchaimahi eta majaraíva éma Viya. ¹⁰Nácanísera náemunacahi éna nachamuriana, nanasirichuhi te majaraíva éma Viya. Tásiha, tíuríhi eta napaisirahi, apaesa vahi náejecapavahini. ¹¹Énasea éna nácani nacatichahi éna nachamuriana, nanasirichuhi éna te timapícu. Vahi náechahíni eta napaisirayare eta náítaresira, taicha eta timapícu vahi táisapahíni náimairiricahíni.

12-14 Eti nuchichanaveana, nucajurehe taicha néchahi eta maperdo-nachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihí ema Jesucristo, ema matiarihiquenehi acane te tépanavapa tamutu.

Eti átinaveana, énerichuvare nímiaturecahehi taicha tanasirichu íúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

15 Emutu eti, vahi ecujamuracha eta tauriqueneana te juca apaquehe. Váhivare ecujamuracha eta tatiarhiqueneana tayehe eta juca apaquehe. Te nararihipuca ena najamuracha eta tauriqueneana te juca apaquehe, vaipa émainahini náemunaca ema Tata Vicaiyaquene. 16 Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tauriqueneana. Najamurachaipa eta apayehe. Navarahaipa nacayehe náimijachaipapuca tíurihi eta náimairahi. Te ticaimahaqueneanapa, tisiñavanapa táicha. Eta juca napanereruana, vahi máijjaruinahini ema Tata Vicaiyaquene. 17 Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamurachaqueneana ena achaneana. Vítisera, te visuapa eta mavaraquene ema Viya, máichecuarquirénapa eta vítaresira.

Ena ticatianacana ema Cristo

18 Nuchichanaveana, puiti tiánehinapa eta táichecuiraya, títavainapa tamutu. Vimetacaheripa eta máitesirayare ema maca achane ticaijare Ánticristo, ema ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuiraya tamutu. 19 Ena ticatianacana ema Cristo náuchurehi eta viyehe. Váhisera viúmurivainahini éna. Taicha te viúmurivainahini, nanasirichuhini eta viyehe. Náerajiruvaipahisera eta viyehe. Tásiha, vímatipa eta vahi viúmurivainahini.

20 Ema Viáquenu Jesucristo tíjaracahehi éti ema Espíritu Santo. Tásiha, emuturipahi ímati eta yátupiqueneana. 21 Nucajurehehi táichavenehi eta ímatirahi. Nuvaraha ácaicutiaraquenénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

22 Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepaina. 23 Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vimutu viti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴Tásiha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapaneruiru eta júcana, iávahácayare ema Tata Vicaiyaquene émapa ema Machicha. ²⁵Taicha títjaracavahi ema Jesucristo títjaracahaviya eta vítaresira máichecuaraquirénapa.

²⁶Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

²⁷Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímítucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸Puítisera, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsiriha mayehe eta te machava. ²⁹Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

Viti machichanaveana ema Viya

3 ¹Nuchichanaveana, tétavicava táramicareva eta máemunasirahavi ema Tata Vicaiyaquene. Yátupihi tímijarechahavihi “machichanaveana”. Puítiripa yátupiquenehi machichahaviripahi. Énasera ena apamuriana achaneana vuúchaha nácaicutiarahíni eta macachichairahavihi ema Viya, taicha vuúchaha náimatihíni eta máemunaraivahi éma. ²Némunacasareana, vécharipa eta macachichairahavipa ema Viya. Vuúchahasera tímechahavi éma eta viúrivayare. Vécharipavare eta vicitirayare ema Jesucristo eta te machava. Taicha vímahayare eta máimahiquene éma. ³Tásiha, vimutu víti vicuneyayare eta vicitiraya ema Jesucristo, puiti vácuticaca viúrihini tácutihini eta máurivahi éma.

⁴Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi. ⁵Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana. ⁶Víti, te viávahácahi ema Jesucristo, tituparachavi vaipa vicuimisiapava tayehe eta pecatuana. Énasera ena ticapecaturarahiana vahi náimatihini ema Cristo.

⁷Nuchichanaveana, vahi ecuisapava navayuacahe. Víti, te vímisia-pavahi tayehe eta táuriqueneana, vímerecoya eta viúriya. Vicutinapa ema Jesucristo eta máetaviuchirahi eta máuriva. ⁸Te náimisiapava ena apamuriana tayehe eta tauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

⁹Víti machichahaviripa ema Viya. Váipa vímisiapavaimahi tayehe eta vicepecaturairana taicha vicutinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicepecaturaimahi. ¹⁰Nácani vahi tíchanahi eta táuriqueneana, váhivare náemunacahíni ena nachamuriana, náimerecachi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecavahi eta macachichairahavihi ema Viya.

Eta vémunasiracaca

¹¹Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. ¹²Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana. ¹³Nuparapenaveana, énerichuvare puiti nararihiya ena achaneana ticatichaheanayare éti apana. Váhisera ecuarami eta juca.

¹⁴Nuparapenaveana, véchahi víti eta víápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énaserá ena vahi náemunacahini ena nachamuriana, nanasrichu. Vahi tíuchucuhanaimahi tayehe eta náepenira. ¹⁵Namutu ena ticatichanahi ena vichamuriana, nacutihi ena ticapahiana. Eta náichararacavayare ena ticapahiana, véchahi eta namauchucuirayare. ¹⁶Ema Jesucristo tímechahavihi eta máemunasirahavihi, taicha tjáracavahi tépena vítívenehi. Tásiha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi. ¹⁷Te mararihi ema mácani achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya. ¹⁸Nuchichanaveana, vémunacacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasínavaya te mamirahu ema Viya

¹⁹⁻²⁰Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahiquenehi éma. Téchahi tamutu. ²¹Tiúripana, némunacasareana, te tájina eta tapicacararasiravaina eta visamure. Tásiha, vahi vipicaimahi eta viyasearapianaya mayehe ema Viya. ²²Vicasíñavainapa eta májjarasirahaviyare tamutu eta viyasearuanahi, taicha visuapahi eta mavanairipiana, vicurismurechahi ema Viya. ²³Eta juca mavanairipianahi: “Ecasíña ema Nuchicha Jesucristo, énerichuvare émunacaca”. Tacahehi eta

mavanairipi viyehe. ²⁴Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarahirahi ema Viya eta viyehe, máicha ema Espíritu Santo mavaneruhi éma.

**Ena mávaháruana ema Espíritu Santo énapa
ena mávaháruana ema Váinaraji**

4 ¹Némunacasareana, ecuneuchava nayehe ena tépiyacavana ticame-tairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásiha, te náitecapauchahépuca ena návaraha tímitucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapiñanahí víti. ²Eta juca eta ímatiarayare ena mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”. ³Énaserá ena apamuriana, te náñauchahípuca eta yátupirahi achane ema Jesucristo, vahi mavaneruanaina ema Viya. Éna, ticatianacanáhi ema Cristo. Vimetacahepá eta náitesirayare ena ticatianacana ema Cristo. Tiuri, puítirichu nararihipa ani viyehe.

⁴Nuchichanaveana, éti machichahe ema Viya. Néchahi núti eta emaisa-piravahi tivayucaheana taicha mávaháruhehi ema Espíritu Santo. Éma, túmepanáhi mayehe ema Váinaraji, náehiruhi ena nani tivayuarahiana. ⁵Ena nani, tahapapiricavacahi eta tájiparacana tayeheana eta apaquehe tauriqueneana. Tásiha, ena achaneana máehicarahanahi ema Viáquenu náuricaipa náitecapauchavaca. ⁶Vítisera machichahavihi ema Viya. Tisamararahaviana ena tímatiana ema Viya. Énaserá ena apamuriana máimatirahana ema Viya, vahi tiúrimahi eta nasamirahavi. Tásiha, tímaticareanaya ena mávaháruana ema Espíritu Santo. Énerichuvare tímaticareanaya ena mávaháruana ema Váinaraji.

Témunarahiquene ema Viya

⁷Némunacasareana, tacamunu eta vémunacaca vámutu. Taicha ema Viya tímitucahavihi eta vémunasiracacaya. Vimutu viti vémunacacanáhi, étapa tímereuchahavihi eta macachichairahavihi ema Viya, yátupíhi eta vímatirahi éma. ⁸Énaserá ena nani vahi témunacacana, vahi náimatihini ema Viya. Taicha ema Viya, yátupiquenehi eta máemunaraiva. ⁹Éma, túmechahaviripa eta máemunasirahavihi, eta mavanésirahi ema macarichuquene Machicha. Mavanecahi títeca te juca apaquehe, tíjaracahaviyare eta vítaresirayare máichecuaraqurénapa. ¹⁰¡Tétavicava eta máemunasirahavihi! Vítisera vahi vítvainahíni vémunaca ema Viya. Mativahi ema témunacahavihi. Eta máemunasirahavi ema Viya, májjararecahi ema Machicha. Mavanecahi tépenayare te crusu étavene eta macaepahairayare eta vipecaturana.

¹¹Némunacasareana, máetaviucha eta máemunasirahavi ema Viya; tásiha, vítipa tacamunu eta vémunasiracacáina. ¹²Nuvaraha ácaicutiara eta juca:

Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásiha, vicutihi ema Viya eta máemunaraivahi éma.

¹³Puiti, viti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espiritu Santo mavaneruhi eta viyehe. ¹⁴Tásiha, viti vicachaneanaripa ema Jesús, vimetacavacapahi namutu ena vímanaruanapahi eta máucupaisiraipa te anuma, taicha vivaraha náimatiyare namutu eta mavanesarahi ema Viya máiteca ema Machicha ticatiuchahaviyare vimutu viti achaneana te juca apaquehe. ¹⁵Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, étapa eta návahásirahi éma.

¹⁶Víti véchahi eta yátupirahi máemunasirahavihi ema Viya. Eta tacahe, vicasiañavahi eta mayehe. Témunarahiquene éma. Tásiha, víti apana, te vémunarahipuca, viávahácaya ema Viya; éma apana, tiávahácahaviya. ¹⁷Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vipicaimahi eta jena sáchezare te viyanapa te mamirahu ema Viya. Vahi vipicaimahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaimahi taicha vicasiañavahi eta máemunasirahavihi ema Viya. Te yátupihipuca vicasiañahi, macaesamiricaya eta visamure eta vipisira. Tásiha, nácani tipicanahi, napicahi taicha vahi nácasiañavahini eta máemunasiravacahi ema Viya.

¹⁹Víti vémunacahi ema Viya taicha ema mativahi témunacahavi. ²⁰Te nararihipuca ena nacahehi: “Viti vémunaca ema Viya”; téheserapuca nacatichaichucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiquenehi. ²¹Eta juca eta mavanairipihi viyehe ema Viya: “Émunacanu nuti yátupiquenehi Viya; émunacavare ena echamuriana”.

Virataha vínajica eta tamauriqueneana

5 ¹⁻²Yátupihí eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyaichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya. ³Étavene eta vémunasirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana. ⁴Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímicatacahaviripa ema Jesús táichavenehi eta vicasiañairahi eta mayehe. ⁵Víti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhi víti virataha vínajica eta tamauriqueneanahi eta vítaresira.

Ena Jesucristo, Manerejiruhi emá Maiya

⁶⁻⁸Te títécapa emá Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi emá Maiya. Eta une étapa eta máitine témechahavipa emá Jesús eta émairaquenehi Cristo. Ena Espíritu Santo, émapa títámetacahavi. Taicha emá Espíritu Santo yátupihí eta mametarapiana. Eta une, eta máitine, émapa emá Espíritu Santo, eta juca mapanaquene témechahaviripa. Ticuticacahí eta tacayemaqueneana. ⁹Tacutihí eta masuapacareva emá mácani achane tiuri. Tiápajucavasera tasuapacarevapana eta mametarapiana emá Viya mayehe emá Machicha. Ánipa macahe: “Émara nuchicha, némunarquene emá maca”. ¹⁰Tásiha, te vicasíña emá Machicha emá Viya, visuapava vicasíñava te visamure eta yátupirahí eta mametasirahí emá Viya. Ena apamuriana vahi nasuapahini emá Viya, náimicutichapa máepiyahirahihíni emá Viya, taicha vahi nasuapahini eta mametarapianahí mayehe emá Machicha. ¹¹Étarichuvare eta juca eta mametasirahí emá Viya, eta máijarasirahaviripa eta vítaresirayare máichecuarquirénapa. Ena Machicha emá Viya, éma téchahí eta vítaresira. ¹²Ena ticasíñanayare éma, títarecanayare. Énasera nácani vahi ticasíñanahí emá Machicha emá Viya, vahi títarecanaimahi.

Ena vítaresirayare máichecuarquireyare

¹³Tiuri, némunacasareana, nuvaraha échayare eta ítaresirayare máichecuarquirénapa, taicha ecasíñahí emá Machicha emá Viya. Eta tacahehi eta nucajureirahehi.

¹⁴Tásiha, tájina táéñamavacarehini eta viyasearuanahí emá Viya, taicha véchahí víti eta masamirahavihi, taicha eta viyasearapiana tásihaqueneanahí eta vímatiequenehairahí eta mavarahaquenehi emá Viya. ¹⁵Tásiha, véchahí eta máijarasirahaviya tamutu eta viyasearuana, taicha véchahí eta tasamacarevahi eta viyasearapianahí eta mayehe.

¹⁶⁻¹⁷Tamutu eta tamauriqueneana náichahí ena achaneana, emá Viya máimijarechahí “pecatuana”. Jararihi eta pecatuana tíñehipana mayuchaticavaneya emá Viya eta vítaresira táicha. Jararihivare eta apana pecatuana váhirichu tíñehicha. Te mararihípuca emá mácani vichamuri ticapecaturarahí, eta váhirichu tíñehicha eta máepeniraina; te ímahapuca eta macapecaturairahí, éti eyaseuchaya éma, mayehe emá Viya. Tásiha, emá Viya máijaracayare eta máítaresirayarechaha emá ticapecaturarahí. Téhesera mararihípuca emá mácani ticapecaturarahí eta tíñehipana mayuchaticavaneya emá Viya eta máítaresira, vahi nuvanecahe eta eyaseuchahini emá maca achane ticapecaturarahí.

¹⁸Vecha eta vahi vímisiapavaimahi tayehe eta vicapecaturairana viti machichanaveanahí emá Viya. Taicha emá Machicha emá Viya tijaneacahavihi vimutu víti. Vahi máratahaimahi ticaetemahavi emá Váinaraji.

¹⁹Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

²⁰Vítisera véchahi eta máitesirahi eta te juca apaquehe ema Machicha ema Viya. Éma tímitupanahavihi. Émavenehi témesenicahavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuarquirénapa.

²¹Nuchichanaveana, vahi ecucasiñaraji; vahi ecucuti ena achaneana ticasiñarajiana eta achanemirana.

Tamutupa eta juca néchajiriruvanahi eyehe.